



REPUBLIKA E SHQIPËRISË
KOMISIONERI PËR TË DREJTËN E INFORMIMIT DHE MBROJTJEN E TË
DHËNAVE PERSONALE

Nr. 617 / 3 Prot.

Tiranë, më 12/5/2017

V E N D I M

Nr. 78, datë 12/5/2017

Në mbështetje të neneve 29, 30 dhe 32 të Ligjit nr. 9887, datë 10/03/2008 "Për Mbrojtjen e të Dhënave Personale" i ndryshuar, Ligjit nr. 44/2015 "Kodi i Procedurave Administrative të Republikës së Shqipërisë", të procesverbalit të hetimit administrativ dhe provave të administruara në ngarkim të kontrolluesit "Studio Geo - Bruna", Tiranë;

VËREJ SE :

Në zbatim të Urdhrit nr. 106 datë 03.04.2017, të Komisionerit për të Drejtën e Informimit dhe Mbrojtjen e të Dhënave Personale, u krye hetim administrativ pranë kontrolluesit, "Studio Geo - Bruna" person fizik (nipt **L12323006E**) me objekt:

- Zbatimi nga ana e kontrolluesit i ligjit nr. 9887, datë 10/03/2008 "Për Mbrojtjen e të Dhënave Personale" i ndryshuar, dhe akteve të miratuara nga Komisioneri.
- Përpunimi i të dhënave personale në kuadër të implementimit të projektit "Për identifikimin dhe popullimin e adresës për çdo shtetas në terren".

Kontrolluesi "Studio Geo – Bruna" (person fizik) ka si objekt veprimtarie të deklaruar në QKB, ofrimin e shërbimeve topografike, vlerësimi i pasurive të paluajtshme, ndërmjetëse, etj.

Në kuadër të implementimit të projektit të përbashkët të Ministrisë së Punëve të Brendshme dhe Operatorit të Shpërndarjes së Energjisë Elektrike (OSHEE) "Për identifikimin dhe popullimin e adresës për çdo shtetas në terren". OSHEE ngarkuar me vendim të Këshillit të Ministrave për zbatimin e këtij projekti, ka deleguar përpunimin e të dhënave te përpunuesi "Bashkimi i Operatorëve CSI Piemonte-Consorzio për il sistema informativo, Datech sh.p.k dhe Çelësi sh.p.k (BO)".

Shoqëria "Datech" sh.p.k, si përfaqësuese e BO-së e cila është në rolin e përpunuesit për llogari të kontrolluesit OSHEE, ka nënshkruar një kontratë delegimi me subjektin nënpërpunues "Studio Geo Bruna" nëpërmjet të cilës i ka deleguar disa shërbime që kanë të bëjnë me kryerjen nga ana e kontrolluesit të shërbimeve të karakterit administrativ e organizativ për përzgjedhjen, rekrutimin e specialistëve si dhe organizimin dhe mbikëqyrjen e punës në terren.

1. Në zbatim të objektit të parë të Urdhërit të Komisionerit, nga verifikimi i kryer në regjistrin elektronik të subjekteve kontrollues si dhe në protokollin e Zyrës së Komisionerit, rezultoi se kontrolluesi “Studio Geo - Bruna” nuk kishte përmbushur detyrimin për njoftim në zbatim të nenit 21 të Ligjit nr. 9887, datë 10/03/2008 “Për Mbrojtjen e të Dhënave Personale” i ndryshuar.

Në paragrafin 1, të nenit 21 të ligjit, parashikohet:

“Çdo kontrollues duhet të njoftojë Komisionerin për përpunimin e të dhënave personale, për të cilat është përgjegjës. Njoftimi duhet të bëhet para se kontrolluesi të përpunojë të dhënat për herë të parë ose kur kërkohet ndryshimi i gjendjes së njoftimit të përpunimit, sipas nenit 22 të këtij ligji, të njoftuar më parë”.

Zyra e Komisionerit vlerëson se realizimi i detyrimit për njoftim është i rëndësishëm pasi i jep mundësinë subjekteve të të dhënave që të informohen mbi përpunimin që kryen kontrolluesi dhe realizimin e detyrimeve ligjore. Kjo i jep mundësi reale subjektit të të dhënave për të ushtruar në mënyrë korrekte të drejtat që i jep ligji. Në këto kushte, konsiderohet shkelje serioze përpunimi i të dhënave personale pa njoftuar dhe pa u regjistruar më parë në Regjistrin e subjekteve kontrolluese, të administruar nga Zyra e Komisionerit.

2. Zyra e Komisionerit konstatoi se kontrolluesi nuk kishte hartuar një “Rregullore për mbrojtjen, përpunimin, ruajtjen dhe sigurinë e të dhënave personale” në të cilën parashikohen rregulla specifike mbi mënyrën e përpunimit të të dhënave, sigurinë e të dhënave, afatet e mbajtjes së të dhënave, të drejtat e subjekteve etj, në kundërshtim me nenin 27 të Ligjit nr. 9887, datë 10/03/2008 “Për Mbrojtjen e të Dhënave Personale” i ndryshuar.

Hartimi i rregullores është i rëndësishëm për kontrolluesin pasi përbën bazën e referimit për çdo përpunim të të dhënave, për çdo punonjës, dhe përcakton standartet ligjore për garantimin e një përpunimi të ligjshëm dhe të sigurt të të dhënave personale. Rregullorja duhet të jetë gjithëpërfshirëse (të përfshijë çdo lloj përpunimi të të dhënave personale për çdo kategori subjektësh të të dhënave).

Për shkeljet e konstatuara është mbajtur procesverbali i konstatimit, si dhe në respektim të së drejtës për t’u dëgjuar, në zbatim të neneve 87-89 të ligjit nr. 44/2015, “Kodi i Procedurave Administrative të Republikës së Shqipërisë”, në datën 24/04/2017 është mbajtur seanca dëgjimore me përfaqësuesin e kontrolluesit, lidhur me konstatimet e grupit të hetimit administrativ, përpara marrjes së vendimit përfundimtar.

Kontrolluesi gjatë seancës dëgjimore ka depozituar prapësime në lidhje me konstatimet në procesverbalin e hetimit administrativ, ku pretendon se:

“Studio Geo-Bruna ka reaguar menjëherë pas inspektimit të kryer në zyrat tona, duke vënë në dispozicion të Komisionerit të gjitha informacionet dhe dokumentat e kërkuara nga ana e tij. Brenda ditës në të cilën është kryer inspektimi, është hartuar dhe miratuar Rregullorja “Për mbrojtjen, përpunimin, ruajtjen dhe sigurinë e të dhënave personale” dhe bashkëlidhur Deklarata e Konfidencialitetit, është plotësuar Formulari i Njoftimit i cili është depozituar pranë Zyrës së Komisionerit. Personi fizik Studio Geo-Bruna nuk është përgjegjëse për përpunim apo nënpërpunim të dhënash. Lidhur me zbatimin e Nenit 27 të Ligjit, ne kemi një rregullore të brendshme e cila përdoret dhe është në fuqi për të gjitha punët që merr përsipër zyra ime”.

Lidhur me këto pretendime Zyra e Komisionerit sqaron se:

1-Në lidhje me pretendimin se: *Personi fizik "Studio Geo-Bruna" nuk është përgjegjës për përpunim apo nënpërpunim të dhënash*, nuk qëndron, pasi nga verifikimi i kryer pranë kontrolluesit si dhe nga analizimi i kontratës me subjektin "Datech" rezulton se kemi të bëjmë me një marrëdhënie kontraktore nëndelegimi për përpunimin e të dhënave sipas parashikimit të nenit 20 të Ligjit nr. 9887, datë 10/03/2008 "Për Mbrojtjen e të Dhënave Personale" i ndryshuar, dhe Udhëzimit nr. 19 datë 03.08.2012 të Komisionerit mbi "Rregullimin e marrëdhënieve mes kontrolluesit dhe përpunuesit në rastet e delegimit të përpunimit të të dhënave dhe përdorimin e një kontrate tip në rastet e këtij delegimi".

2- Lidhur me detyrimet e përmbushura nga kontrolluesi në zbatim të neneve 21 dhe 27 të Ligjit nr. 9887, datë 10/03/2008 "Për Mbrojtjen e të Dhënave Personale" i ndryshuar, megjithatë reagimin e shpejtë të kontrolluesit, Zyra e Komisionerit vlerëson se këto detyrime duhen plotësuar përpara fillimit të përpunimit të të dhënave personale nga ana e kontrolluesit.

Në paragrafin 1, të nenit 21 të ligjit, parashikohet:

"Çdo kontrollues duhet të njoftojë Komisionerin për përpunimin e të dhënave personale, për të cilat është përgjegjës. Njoftimi duhet të bëhet para se kontrolluesi të përpunojë të dhënat për herë të parë ose kur kërkohet ndryshimi i gjendjes së njoftimit të përpunimit, sipas nenit 22 të këtij ligji, të njoftuar më parë".

Hetimi administrativ i ushtruar pranë subjektit "Studio Geo-Bruna" p.f është kryer për të verifikuar zbatimin e ligjit nr. 9887, datë 10/03/2008 "Për Mbrojtjen e të Dhënave Personale" i ndryshuar, dhe akteve të miratuara nga Komisioneri, si për rolin e tij si kontrollues në përpunimin e të dhënave po ashtu dhe për rolin e nënpërpunuesit në kuadër të zbatimit të projektit. Aktiviteti i kontrolluesit rezulton se kryhet duke mosrespektuar dispozitat e ligjit nr. 9887 datë 10.03.2008, "Për Mbrojtjen e të Dhënave Personale", i ndryshuar.

Si përfundim, shkeljet e konstatuara gjatë ushtrimit të hetimit administrativ në kuptim të nenit 39/1 gërmat "d", "dh", të Ligjit nr. 9887 datë 10/03/2008 "Për Mbrojtjen e të Dhënave Personale" i ndryshuar, përbëjnë kundërvajtje administrative dhe sanksionohen me gjobë, si më poshtë:

d) kontrolluesit, që nuk përmbushin detyrimin për të njoftuar, sipas përcaktimit në nenin 21 të këtij ligji, dënohen me 10 000 deri në 500 000 lekë;

dh) kontrolluesit ose përpunuesit, që nuk marrin masat e sigurisë së të dhënave dhe nuk zbatojnë detyrimin për ruajtjen e konfidencialitetit, të përcaktuara përkatësisht në nenet 27 dhe 28 të këtij ligji, dënohen me nga 10 000 deri në 150 000 lekë;

Për zgjedhjen e masës së gjobës, Zyra e Komisionerit ka parasysh faktin se shkeljet e konstatuara janë serioze, ato lidhen me garantimin e përpunimit të ligjshëm të të dhënave, të drejtën e subjekteve të të dhënave për t'u informuar mbi përpunimin e të dhënave të tyre, masa organizative dhe teknike të përshtatshme që duhet të merren për të mbrojtur të dhënat personale, si dhe për të mbrojtur aksesin ose përhapjen nga persona të paautorizuar. Gjithashtu, vendimi i Komisionerit bazohet në bashkëpunimin gjatë ushtrimit të hetimit administrativ dhe në reagimin e kontrolluesit për rikuperimin e shkeljeve të konstatuara.

PËR KËTO ARSYE:

Në zbatim të neneve 21, 27, 29, 30, 31, 39/1/d, 39/1/dh, 40 dhe 41 të Ligjit nr. 9887, datë 10/03/2008 "Për Mbrojtjen e të Dhënave Personale" i ndryshuar,

V E N D O S A:

1. Dënimin e kontrolluesit "Studio Geo - Bruna" me gjobë, në vlerën **20 000 (njëzetë mijë) lekë** për shkelje të detyrimit të përcaktuar në nenin 21 të Ligjit nr. 9887, datë 10/03/2008 "Për Mbrojtjen e të Dhënave Personale" i ndryshuar.
2. Dënimin e kontrolluesit "Studio Geo - Bruna" me gjobë, në vlerën **20 000 (njëzetë mijë) lekë** për shkelje të detyrimit të përcaktuar në nenin 27 të Ligjit nr. 9887, datë 10/03/2008 "Për Mbrojtjen e të Dhënave Personale" i ndryshuar.
3. Gjoha arkëtohet nga kundërvajtësi në Buxhetin e Shtetit, jo më vonë se 30 (tridhjetë) ditë nga komunikimi i këtij vendimi. Me kalimin e këtij afati, ky vendim kthehet në titull ekzekutiv dhe ekzekutohet në mënyrë të detyrueshme nga zyra e përmbarimit.
4. Kundër këtij vendimi mund të bëhet ankim në Gjykatën Administrative të Shkallës së Parë Tiranë, brenda 30 (tridhjetë) ditëve nga komunikimi i këtij vendimi.

Ky vendim u shpall sot më datë 12.5 2017.

